

四庫全書

集部

欽定四庫全書

文山集卷七

宋文天祥撰

書

回吳直閣

履齋之子

某少之時聞東南二石筍玉立九霄陵陽蒼蒼實為綠  
野午橋佳處鸞鶴神清縹緲何許老成遠矣尚有典型  
仰惟某官揚休山立之韻日光玉潔之襟文獻堂堂代

有英妙未既見只神爽一方某卧青原山中驅馳良倦  
上恩俾郡越在鳴珂循走彷徨連符趣赴不量此來未  
知所以淑後喬木婆娑五雲絢畫尚祈蘊誨俾就玉成  
某遠奉瑤音緘貺駢錦先施倒置曾是為容既什襲巾  
衍輒鐘鼎以歸太乙之府望履非遙臨風翫翫

與游提刑汶

某以良月之望舉棹東下江空見底乃章貢源頭諸水  
怒長未幾光燄五采與空同雲俱來往颯順風航波瀾

之澎湃灑石鐘之清越寵靈張王迄抵雙溪子月丙寅  
俯祇賤役瓣香西望敬謝所蒙明公卷其十二峯之神  
氣軒軒磊磊照耀東南以宰相才學宰相事天下久望  
其為家壇出色轡絲周道肯復僂遲惠露瀼瀼江之民  
幸矣如溥寰何會有溫綸四輩馳下某不善為斲得郡  
復朽至之日視官官靡視吏吏荒民氣憤憤如也爬剔  
棼絲顧氣力所至終覺五技易窮肘後神奇不敢以望  
之他人惟故山松菊衣被綵雲亦已過數矧茲隴蜀徼

惠未涯微疇昔不及此相望二千里外明月此心懇懇  
側釐掛一漏萬惟青陽將動綿綠光華式金式玉以副  
前禱此豈無骯辱戒為榮

與趙知郡孟道

號菊山

某頃從南浦亭邊抖擻般函道所蒙荷且矯首於太乙  
之府穹林宴坐縹渺絳霄江塗漫漫勞我宵相執事以  
玉雪界之精神臨睨八極朝闔風夕玄圃識者猶竊遲  
之錦衣照道紫淦橫舟蕩漾柳風噓吸竹露澗阿樂矣

如顚顚望歲者何建章夜半尺一堂堂畫省紅雲著公  
高處惟日望之某不善為斷得郡復移以子月丙寅視  
篆昭亭下視官官靡視吏吏荒洗垢爬痒亦曰視吾氣  
力所至然山凋水瘵非刀圭可療肘後神奇惠徼大福  
某不敢以望他人也焚綻淪雪西鄉奉書以謝以祈鼎  
珍履絢願言金護玉持對揚王休臨風悄結

賀前人得盱守

某昨在宣州拜書亡何客攜琳琅來京師欣浣如對勿

忽去國不成報襄歸里以來杜門深念又無從嗣音為  
謝徒有清夢夜遠金峯忽讀邸狀欣審丹鳳揚綸銀菟  
擁鎮八百國封爵莫如同姓之親二千石起家共讚惟  
良之牧先聲載道闔竟為春伏深歡抃欽以某官景緯  
光華仙潢清潤淮南桂樹了無貴介之風李白桃園綽  
有神仙之韻軒陞宜當於三錫轍和肯泣於十同瞻惟  
東盱實介南服紅泉碧澗鬢丹丘白玉紫烟參差綉  
陌聊商羊於朱紱供衍燕於清香大宗維翰价人維藩

不動袴襦之喜九卿孰羔三公執璧言觀袞曷之歸某辱在眷知助喜百倍既不能振翎刷喙從燕雀來謹奉書寄便申慶迓兵當已在道不知開藩涓卜何日某尚當屢賀不一賀臨風馳泝

與趙監丞淇

號平遠

某乃歲之秋緹騎來山中嶽翠蒼寒琳琅照映章不成報內有欲然寧不嗣音僻左之以世道如許風起雲飛中夜人物之思為此耿耿上念井絡丹詔起家峽月棧

雲先聲浩蕩蓋有望木牛流馬再立武侯之事業又璧  
窺萬一意必與南山洎予秀諸公上下雲龍共此光明  
俊偉之舉縮手袖間臨睨天半此其大本領大經綸政  
不易涯之野水橫舟蒼虬縹渺山君川后日有疏附即  
日恭惟台候萬福某漁隈半席自分小休誤渥自天俾  
尋庾謝舊盟意此是拭箒之陋耳三辟弗可乃以  
陽月之望束書出山涉重湖越天江整整四十日抵戌  
以是月丙寅祇賤事凋城敗屋枵然大瓠耳搔首踟蹰

望洋氣縮維宣距鄴僅隔一雲東望熏香奉尺書候起  
處惠徼藥石立我沈痼梅花晴昊柱笏神馳

慰前人

某昔讀檀弓文子之喪既除喪而後越人來弔其居使  
之然也伏惟先太傅大丞相冀國公之喪既有日矣地  
不千里不能往弔一介奉禮今也而後能來死罪死罪  
嗚呼皇天祚宋國有元老數百年宗社之靈長千萬里  
風寒之險要蛟龍在淵虎豹在山屹然長城為此突兀

天乎不使憝遺遽奪之去主上震悼傾動朝野伏想生平翹館之英俊舊日麾下之將士與夫二邊之百姓四塞之英豪見碑而淚望城而悲者不能已已矧夫家門之奇禍父子之至情攀擗奈何嗚呼痛哉某生也晚當公佩天下安危分不得勇往執鞭今而追恨則已無及獨念袖有瓣香歸依平生亦既不克為公壽惟有為天下慟哭敢西望靈輶揮淚百拜而獻之公而可作尚其我許嗚呼悲哉親喪所自盡也抑先王制禮之意是有

節文士君子為孝之道在於顯揚伏惟執事重致意焉  
即日孝履支持某頓首奉狀起居臨紙哽塞

回安福趙宰與搢

號勿齋

某追記疇昔同到蓬萊慈恩之題杏園之宴吾以故不  
與焉然同年之情豈以四海九州為藐然哉王孫乃龍  
種世有龍雲鱗今不遡紫清上峕堯顧得百里之地而  
君之簾陰晝寂千室鳴絃實鄰吾父母國人誦子產今  
其時乎某私獨念今天下豈有可為之縣縣不可為而

可為者人如君者以可而臨不可於是知材具之超常  
流百倍矣長書下貽燼然春華溜若清風與我之厚昭  
仰至情多言不足以殫謝意也某守郡無補誤渥為郎  
縮縮循牆行且歸里當觀崇陰以與邦人共談政化之  
媿亟推吏塵具報記室揆諸來施不敏流汗

比一馬二僮日在泉石深處聞山外塵埃亦頗作惡坐  
對浮雲亦開口笑不自己耳君解墨綬去意紅光紫氣  
冉冉帝側乃猶廬陵客琅畫至前瞿然起仰黃柑紅柚

二美并覲杏苑論情我之懷矣冬江霜涸萬里安流目  
送征鴻知有順帆天際如駛伏楮拳拳中書不中書復  
字蕪穎併希錫察

回寧國交代孟兵部之縉

某去國之前一二日宣州弛征之命下某既為桐鄉百姓頓足起舞即拜書望雙谿豐障為賢主人賀吾輩讀書臨民正為今日行志凡此者各盡其分固非相與為賜也既汰斥歸里即閉門不與人事山巔水涯翛然獨

往而使者忽持五雲來君子之有情於人也既勞問之  
將以厚禮復申其綱繆焉某誠不自知其何以得此也  
宣人歌舞賢侯之德教冠冕像設祝廣成千二百年令  
公二十四考蓋人心之天也某何人斯偶以一日出位  
言語乃得因見大夫以自附於去思之義某德微以堪  
回首碧落山川鬼神猶有餘愧宣敗壞至矣弛之則期  
會散繩之則撫字虧公折回蟻封從容不迫期年而變  
古語不誣方今論選表無出潁川右者曷不均弘俾孰

事樞某一飯三禱使者之歸也謹東望重拔身心致敬  
陵峯堂下有日延見父老尚願道山林不忘之私與其  
所以不敢當之意進之惟命退之惟命某臨書不勝拳  
拳

回寧國陳節推容

去年闕下拜書稍得數數未幾聞捧檄校文不知陶鑄  
何處人物某自是即汰斥去閉門深山遂無復鱗鴻一  
日之便忽使者來山中欣得妙帖見示小錄方知昨日

衡鑑所嚮近想歸舟蕩漾彭蠡吾知心正在香爐峯白  
雲下耳宣之弛征執事首從臾之幸而集事僅足了吾  
輩之責非相與為賜也書來乃知宣人以此為多祠之  
以識其不忘之意怵惕於孺子之入井豈為內交要譽  
設抑桐鄉父老此意亦能使人感激耳宣為郡凋劇極  
力扶持幕畫間想見勞苦盤錯糾結以試利器天下事  
正有賴於方來耳某前冬一出去秋一歸進退行藏惟  
其所遇而無心焉今則奉親課子彈琴讀書流水青山

悠然獨往不煩故人江雲渭樹之思也史記見貺家藏  
本皆不及尚當朝夕以稱所蒙明善錄一部謾有歸篋  
臨墨馳訴之至

與吳提刑觀

某頃待罪闕下薄奉函書襍被來歸嗣音杳邈上下人  
物感念世道未嘗不於門牆拳拳也某比者伏讀邸報  
欣審玉陛出綸綉衣移節夜醉長沙曉行湘水已著平  
反風酣章貢日麗崆峒更煩輕熟江湖相望原隰增輝

某官宣慈而惠和高明而正直義豐授受孔孟氏之淵源江左聲名王謝家之門第蚤立登於闔閨遙坐厭於蓬萊竹馬相呼春生襦袴星輶所至雨卧杼楊茲游捧於英函乃肯臨於梓部刺史故人按事飲酒情法相當忠臣孝子畏道驅車君親交盡靡需席暖已趣詔溫某杜門深山去城郭甚遠而於太和差近初謂旦夕使舡泝贛石而前可於快閣上下迎候一拜忽傳英蕩小駆青原某揆之始望則蹉跌矣瞻睇行臺輒易奉狀代敘

燕雀之萬一若夫揚清激濁洗冤澤物閭閻欣欣無所  
患苦使屏退之蹤亦得從訛訛以自放適是則某之所  
自賀者也臨紙切切

與湖南陳提舉合

號中山

某猶記乙丑之夏從江西提幹得往來行書江濶雲空  
年光如水每懷世道上下人物未嘗不中夜耿耿某茲  
者恭審奉少府節駕常平車衡獄連雲遠挹海山之秀  
天囷麗漢近垂楚分之光原隰春深旌旗風動伏惟歡

慶某前年與公同除郎去年與公同除節不才安得追附名勝自分却立下風猶幸時論不磨得公輩落落參錯使民物吐氣國庶幾耳相望千里北斗在天何時執鞭寫此仲叔

回林學士希逸

號竹溪

某夙有幸獲與介弟為賓恭因之有以詢居處著作之萬一不戚戚得喪而言語文章足以詔今傳後竹溪先生何憾哉一日之赫赫者多矣千載而赫赫者幾人為

一日計者無千載也決矣云云

回贊守李宗丞雷應號樓峰

某偃薄林阿不虞使者之涉吾竟也迺自空同來顧我猿鶴米家書畫光怪滿山此豈四海九州同年無情者邪僕家青原深處實與君侯黃童白叟接畛而處自下車以來但見年穀獨登鼈鼈屏息不需數月報政赫然茲豈獨千里能事環君侯四境雞鳴犬吠晝夜相聞實共受賜僕也彈琴讀書於其間其賜多矣敢圖高誼厚

鎮撫之委貳盈箱非所當得睇瞻霄立頓首知歸吾鄉  
宰邑於使天之下者三人焉其一為陳行夫若羅子遠  
蔡濟甫皆曲江齊盟者奉令承教必有可觀廬陵一歎  
異於常年田里憔悴不堪舉目惟章貢素無耀事而得  
歲又偏鄉人顛頓者往往相率而趋治國民食闊繫苟  
可通融兼愛秦晉公之惠也謹復書空山白雲無足持  
報薄言采藻臨風如馳

回交代湖南憲新除湖北漕李宗丞

某既專鱗幅奉起居猶有腹心不嫌齋壁某屏卧寃間  
無復山外想公朝念其流落卑節起家使之繼明公印  
綬之後聞命慄然不知所為堂有重謾蓋年耄矣湘行  
且千里舟車迎侍不堪顛頓是以懇悃丐祠冀便私養  
天高聽邈促旨旦頒叱馭回車進退維谷將從鶴髮而  
來耶則非養志將又以香火請耶是何為者而為是瀆  
也謀之乃心稟之親老旦夕姑以旨甘屬弟輩單車將  
指以明不敢自棄於明時而復以不得將母重告之造

命俟驅馳數旬即乞身以歸為臣子稍盡已分耳某於  
門牆知已論交非一日天又開之以奉令承教之機是  
其與四海九州之同年其有情益倍倫等誠不圖解后  
及比古之君子其為人也謀之必忠愛其人也惟恐其  
不入於德故敢亹亹陳出處之槩惟執事啟誨而圖利  
之言不盡意臨風如馳

與江西黃提刑震

某幸托年盟夙依塵部竊跡萬山底衣被末光飲墜露

餐落英粗安半菽公之餘也久疎晤寫滿目春雲一水  
盈盈遡詹河漢某茲者共審出綸鳳闕移節虎城春信  
初傳立變旂揚之舊天光下照重瞻禮樂之新依然故  
部之江山籍甚先庚之號令伏惟驩慶某官剛不吐而  
柔不茹寬有斷而愛有威發為文章正諧韶濩勁沮金  
石凜然節槩光垂虹蜺聲揚紫微早分潁川二千石之  
符就秉天囷十三星之節據案叱吏笑比黃河清開門  
賑飢功過中書考上久簡孟博登車之志公遂為勝之

持斧之行春風遍地而狴犴虛夜月當天而鼴鼯伏載  
馳載驅維騏維駱靡憚周咨來游來歌如圭如璋言觀  
肆覲其避影杜門久矣不作山外想不圖元會之日上  
恩覃及流落界相獻於珠玉之側虎鼠同器猿鶴笑人  
云云

回林司業應炎

某夢想巍巍堂堂於朝花院柳間追隨猶昨日事也玉  
烟劖氣轉鶻嶧嶧杳然在碧雲崔嵬之外江月流水實

照沄沄某官以冰輪金井之心胸發黼黻火龍之光燄  
而又慥慥乎言行皦皦乎進退若汲長孺若陸敬輿若  
慶歷元祐諸賢充公之為表裏庶幾其無愧領袖斯文  
旗翼元命天下以此望公者殆人人同願玉立以需之  
某自歸來乎山中俯仰半菽不復得與四方書牘從事  
比從戶曹黃文得誨函草木同味玉雪照心欣懌之餘  
感慨係之某踐蹕之蹤何可為者大化驅之一節誤落  
湘雲避走陳情愈旨竟闕單車徊徨且此首途行復求

返吾屠羊而已渺渺天一方重此懸涼專容陸續貢敬

回信豐羅宰子遠

名椅號

澗谷

某去年聞雙鳧南上落落空山不如燕雀之為有情也  
大化驅人作江東客數月爬梳榜瓠未見端倪會誤恩  
召環滂班過當亡何狼狽而去蓋踈闊以來居多道路  
之日出處乖方滋可為笑杜門息影中高情厚鎮撫之  
專介持書勞苦臨風馳感可人天一方信豐山水邑見  
謂讀書松竹畫影滿簾著吟人其中所謂予方有公事

此豈錢穀吏比耶勿需終更西清有詔璧弟何為者赴  
新昌且百日商鉅馳河未知攸濟惠徼如天之福寡過  
多取數矣贛瑞皆佳邑藹藹吉人鼎立空同真一時之  
盛當路或令舉所知某幸甚有以藉手薄言修布小附  
片心非敢謂報倚筆詹泝

某臘前函書往來庶幾契闊之意年光冉冉驚見雙璧  
蓋曾兄季困專紀綱實來仰惟同年長者所以惠綏荒  
寒皆可感也某雲卧深山世意落落一起一仆非人為

之上天蓋高匪怒伊教敬威念咎安得不力執事昔為  
之助喜今亦有以救其不逮乎敢請季因值儒者之窮  
執事以氣類遇合所以位置之者寵甚萬間寒士公將  
溥其施於一時所謂兆足以行矣某為之歛衽新年喜  
雨燈前報命馳想一方臨紙悄悄

回羅子遠就賀除京榷

某俯仰歲年甚知聞間頃知卷旆來歸衣錦有爛且趣  
舍人裝于于然東矣亟欲擘箋所思雲頽鶴倦不可拈

拾竟墮夢寐外時一動寥廓想江邊鷗鷺為之悵然忽  
得手書責我空谷華袞流離辟易久之其審帝闕出綸  
天京司轄姑養造鴛之望佇傳義冢之音伏惟驩慶明  
公契古胸襟吞雲夢者八九外物瑣瑣遲速何心積之  
厚發之弘宇宙間華軌清貫將次第而取之以其時考  
之則過矣某風雨深山避影却走乃元會之日公朝以  
一節起其流落回首三湘驚心蕉夢請隸香火旨更趣  
行悲親以遠役為憚進退維谷莫甚此時旦夕黽勉拜

命姑單騎之戍馳驅數旬乞身歸卧縣上同年有情不  
隔四海九州之遠母金玉爾音冀一語以自壯拂拭過  
情非所敢當也占對梗槩尚猷嗣箋

某之一日既端拜敬謝芳題并報信豐簿攝雩之槩二  
之日謹遣介馳諸席間寅奉起居不敢繁敘首祈委鑑  
某昨歲入湘後墮身徽縕中詹沂宇下闊焉嗣音繼聞  
趣戒朝裝榮司京榷某念欲箋悅賀廈以申風雲發勅  
之慶一春屑屑行路浸墮因循既抵空同後潼川趙同

年來為縣實在河陽舊桃李處鴻沙指爪猶記東西所  
以告新者甚厚因得切諗脩門近况大帶深衣長身玉  
立道德福澤方來而未艾也吾鄉諸老行輩落落蔚然  
靈光惟今澗谷先生依星辰傍日月一日騎麟駕鳳朝  
闕風夕玄圃勢正順耳某祿陰杳集素辱心期慕王陽  
之回車學毛義之捧檄得郡山深俯仰半菽君師天地  
之造知已錫類之餘也惟是求牧力縵未知攸淑回首  
蔽芾我愛桐鄉豈無一言益其故人并寄父老因風東

向頓首以請

與汪安撫立信

號紫源

某仰惟曠度絕人不作邊幅僕安得以書生刀尺從事  
高明幸察之某昨者為高安受容受察於王斧之下公  
不以衆人畜我我實德公未幾公去之而僕亦以憂患  
連年卧山中蹤跡跋堊未足為知心道也撫念江流人  
物如此未嘗不中夜耿耿某茲者伏審揚綸九陞建纛  
三湘人無異辭國有生氣共惟慶愜欽以其官名高九

牧氣蓋羣公江左管夷吾足係英雄之望軍中范老子  
能寒寇賊之心往者金湯中流忠績簡在上方以南事  
為慮詔公方面隱然長城一代數人百年幾見公不得  
不力紀勳旂常歸袞廊廟自此等而上之某退在漁樵  
未忘婺緯聞公此來為世道擊節偶逢黃君強立長沙  
使介率然上狀仰闡賀床強立名至道某昨嘗薦至館  
下強立每謂公以意氣動人能使人不愛其軀其感激  
知已可見今茲適在冀府從諸公遊公不以生客視強

立強立奉筆墨以佐大閫豈直一日之長而已憑筆僭  
越向風如馳

回前人

某望五雲多處以駕劣下乘幸甚自託於禮樂之下風  
既奉儼函布親贊修大閫府之敬迺不我後先使者銜  
命即之於深山中翰墨陸離光動蔀屋拜而後敢讀讀  
已而亟拜居今天下論人物一方一曲之士隨世以就  
功名謂之無益於成敗之數可也當大方面建大將旗

鼓使國有龍虎馬不敢南向其周公瑾祖士稚之流乎  
天子召拜樞近修勞還故事少府旦出節付以西北煩  
公辦此金戈凱馳歸袞廟堂作太平六典四海以此望  
公亦公志也某少也驅馳嘗有意事功雞鳴奮發壯懷  
固在然而亦少衰矣被旨行湘顛倒繡衣豈堪重著惟  
宿昔於門牆辱知已厚惠微宇下恃此敢來適三月移  
卜先瑩有山間之役受印之期尚在夏五竊聞四輩在  
道車馬有行色天殆嗇其一見之機乎何為屢得之而

屢失之也追憶前年自直廬汰歸公以書存問推許不  
薄海內時流得比於名公者正恐無幾今承獎翰益佩  
卷卷江濤渺然事會何極何時執鞭寫此傾蓋某臨風  
無任馳泝之至

與胡都承穎

號石壁

某已端具儼犧候敬籤房心之精微敢嗣陳之某於當  
代知名夙有取履結韁之願寄書海外嘗寫我心遠道  
報襄如見顏色伏自牙蘚卷零雨而還鴈閣湘深馳泝

寥廓伏惟以任重道遠為心以難進易退為節巍巍堂  
堂卓然佩安危而繫輕重乃今聖哲馳騁上心焦然金  
城圖意師表微公孰與於斯追鋒在道不俟駕行矣某  
家畏壘山下麋鹿之與羣而猿狹之為曹也公朝起其  
流落山衣易繡舊夢恍然一節走趨幸在通德里九轉  
寵靈輦輶肘後某行當掃門以請拜狀梗槩臨風卷卷  
某一節出山指碧雲崔嵬八風吹不動處知為神龍卧  
洛所也前者幸甚脫屨堂下進瞻芒寒適子之館授子

之粲胸中經綸之奇傾倒敷露中夜慷慨音落九霄使人驚且喜今而後知宇宙間未嘗無劉玄德輩某持以去岣嶁襟袖尚有萬丈光此殆未可與俗人言也某以疎決故一輦下長沙初約先拜見而後往帥垣下偶有牽制稍違息壤之舊今茲回棹潭濱將由便道單車負荆門屏之外輒遣一介先道其私幸豫戒猿鶴勿以俗駕為拒率然馳控倚卜面敘

慰饒州胡通判

石壁  
之姪

某茲者不圖先令叔某官石壁先生遽捐里館風馳上  
征哲人云亡邦國殄瘁執事者骨肉至慟為國受弔撫  
孤大誼定力如山足可以對嶽雲之崔嵬矣顧惟某落  
落後出辱二阮之知乃在一日之間老仙用意慷慨與  
之上古今撫念人物袖中辦香僅僅拈出一再老仙  
所以命之者更在度外鑿桐之音方希而化人之裾已  
不可追矣出聲慟哭悲不自持謹哀綴壹鬱賦為奠詞  
往者如生尚為我惻惟一賜宣燎豈勝感涕之至

與安撫李大卿芾

號肯齋

某已專具儻櫝申敬記室私心梗槩不嫌裔嬖某辱知愛門牆非一日之故風流雲散一別如雨每一念此神爽飛馳江湖一雲本不甚相隔彼此出處解后參差至闊絕乃爾僕之罪多矣明公當世人物卷韜山林四方顚顚望其一出方時多艱婆緯忘食然見王茂弘者固以為江左有管夷吾某有計日以俟鋒車耳某避影深山久不作馳騖想公朝念其流落界節起家釋縣上來

而于征未知所以淑後幸甚區區走趨實在中台之里  
十年契闊一旦逢迎豈命物者開其親炙之機而惠顧  
之乎如聞閉門謝客雅意絕塵然待故人固自有情猿  
鶴必不我拒相望寢近凝汎如馳

回永州楊守履順

巨源之後

某尚論一世人物紫朱其綬唱呵車塵若是者駢肩矣  
求其忠義貫日月處漢賊危疑之間臨大節而不可奪  
至於殺賊奴取繫繫金印此事付度外豈不凜凜大丈

夫哉父老講傳百年間吾見先太師一人而已某官鍾  
岷峨之秀嗣彝鼎之勲忠臣之門天人之所共祐國士  
之器君相之所東知石崖齊天唐中興頌功處也公來  
其間寧不感慨今蜀道難蜀道難公收拾羣人手揮天  
戈一節之還從甘棠刻第二頌旂常濯濯光于前聞人  
某何幸身親見之歸隱空山望湘雲千里不圖使者遽  
涉吾竟仰惟明公主張斯文經始棘院以相龍飛興賢  
之盛大張門顏使某也得執事從君侯所以厚我不同

他人小人雖無能為役烏乎敢辭貢院二字僭易奉上  
進之退之惟命未諧握手往來心聲庶幾古道之槩臨  
紙拳拳

回林侍郎卿孫

號雲屋在臺時

某從望闕山矯首五雲多處寢疎起居長沙少府傳仙  
惠書并繳貺琳琅之翰仰惟縗衣宛變古道顏色為之  
歆拜傳仙不肯望然而來以書先訂出處此意亦頗謹  
重已遣禮聘之且告以初筮如九層臺基須令堅壯可

卷之二  
耐靜以待次不失雅道未知傳仙何所嚮若其來訪敢不惟命戒之共

回前知衡州楊祕監文仲

某已端飭儼肅致敬心之精微不嫌齋擘首祈垂烟某於足下非敢以氣類詭流俗之蹤尚想疇昔載色載笑相遇不同他人至今厯厯在夢時方孔艱荆吳多壘坐廟朝籌帷幄折衝俎豆正張趙韓范之事業湘水以西勤勞一障天子曰歸偕徑斯文本色俾執事樞歎見之

晚某閉關念咎不復作馳騖想公朝出節誤及荒濱回顧黔驢曷對湘鴈趣命且放單車于役稍盡君親之誼即尋香火之緣衡雲照人垂執鞭弭乃上天笙鶴不復顧雞犬矣所恃襟期有素且未忘甘棠則其居中庇之誨之某與蒸湘之人均利賴焉昂首慶雲伏楮耿切

與劉尚書黻

某夜拜文昌朝馳函敬感激亹亹不嫌齋壁首祈穹采某庚午待罪底班望英躔萬丈於緣綸閣天章潤色衣

被青黃雋永味言稱於天下曰知已歸伏山阿分霄壤  
絕不敢以世俗書尺候主進吏熏香宣夜北斗以南共  
惟某官文章穠言而舉謨器度商彝而周鼎陶鎔帝皇  
轡轕造化燭六合蕩八垠吾道之福布濩流行翠幄青  
瑣之從容文劍紫荷之凌厲由八座而間兩社使天下  
再見希文稚圭之風流某嘉與人士旦旦稽首某瓠落  
之蹤一意返哺夢寐不到山外公朝未忍捐棄拭拭而  
起之復令效湘節牛馬走煙霄流眄不進不止蓋疇昔

之盛心未憇也某始以私養丐閑廩天高聽邈且趣之  
再奉明命以趨一之日甫履回鴈布宣德意唯謹湘人  
尚力抵氣味俗輕生蘇息而調服之既竭吾力焉垂天  
之雲覆燾其上訖濟我後某為之夙夜願言因謝有祈  
臨風悄結

與陳察院文龍

號如心

某夙在眷知屢牋契闊杓粲奎明經緯碧落曉夕詹馳  
伏惟執事以光明俊偉之胸負法家拂士之望鳳鳴朝

陽萬物吐氣龜廈密勿熙明日新陸贊處中汲黯居禁  
精神強而本根充外難不足平也上方屬以經濟俾執  
事樞某歷落之蹤豈堪使事公朝不忍終棄盡出噓揚  
始以私計不使迎侍冒干間廩趣旨且放單車于役以  
五月一日受印司存既見父老具宣上德意然允猾相  
挺山凋水療扶持調習庶幾一日非晚且再陳情為歸  
養計侯誰在矣張仲孝友儻語循比藉手不足以當効  
首之一快臨楮無任

某輒有稟瀆某昔者以臬歿由書生本色只當在斯文  
一邊不應以刑獄為職故凡寬厚惻怛處人皆由之而  
不知其有不可以訛令甲者則譁然以為過當所處非  
其位故也自後諸公速有論列皆不實知其人不過以  
前疏潤色而為之辭某常願一日有以自見於天下使  
知吾所謂衡氣機者而未易遂也今年復除憲實不願  
就丐祠不遂銳欲再請又念起自廢間豈當童瀆已甚  
故且黽勉驅馳亦謂姑以平平處之可也既入竟乃知

湖南風俗大不然某若以身事懲創靡然風采懼無以  
肅一路觀聽又坐失職故初至不免見之榜揭謹錄本  
以達台覽夫如此初未嘗有嚴厲之事特示之以警戒  
之意蓋於職分不得不然然才作此差遺便是惡滋味  
兩日刷具一路獄案數目甚多莫非劫掠聚等事他  
時審覆既圓皆不容付之輕典某且獨奈何哉某此來  
不及侍親處此亦大不安俟疎決後惟有乞身歸養所  
恃知已肝膽相照臨書不憚傾倒念其久要其必有以

教之嚮風卷之至

與鄧校勘林

某頃繇春中走赫蹠闖輦下知上徹五雲閣久矣一節  
奔走行役曠焉嗣音矯首河漢盈盈一水某蒙賴如天  
之庇以孟夏八日辭膝下五月朔吉受印於衡陽初見  
吏民既宣上德意退坐棘木塵中與微縕相爾汝為之  
獎獎焉江去湖不甚相遠始者殊不諭其風氣之悉至  
此始知尚力抵氣以血人為嬉九城一波莫障其濶某

以為怒之而不教非古祥刑意也見諸榜揭嚴而不為殘楚人亦頗為動悟其肯綮中也然某以書生為之非其本色不諒者衆此十年所以有申韓之謗以至于今日是安得而忘吹鑾之想乎且重闢以老不得就養單車彷徨雲舍切切旦夕疎決後且即丐還屠羊使叱馭回車於君親兩不為失此其所以謝夙昔君子之教而庶幾乎年盟之盛心也厚德錫類某惠徼福於宇下益方新焉偶逢武亟詞起居且敘其所以跋躠馳驅者

遙對清切臨楮泝詹

與陳直院維善

名合號中山

某隃睇紫霄寅致儼攢心之精微敢嗣陳之某昨承鵠袍出使駟騎歸班嘗領廬山下所賜手書光氣垂虹下照空谷撫歲年而如雨恍河漢之一水也中山先生文運斤而成風氣振策而奔電元龍湖海突兀宇宙支架明堂曲搃萬丈光芒緯國典華帝制天下固以為未也大明奎璧晉執事樞使士者顥顥歌仲淹弼一夔一禹

某落落青山自返吾哺公朝未忍捐棄界之一節使與衡鷹相周遭草木吾味一引手馮翼之端出緇好某始以私計求間廩聖恩闕俞且趣之載道遂以朔日見吏民宣德意然楚俗尚力抵氣殺人為嬉撫存而調習之未易為力明公宿昔塞帷棠陰如屋五雲緯霄影落衡杜某為之夙夜願言因謝有祈臨風依遡

某頃侍親抵郡輒持尺素專貢紫清懷今雨之綢繆望下風而慷慨也璧弟來京師拜夫子之門黃河泰華天

下鉅麗之觀璧也所遇多矣今天下稱文章大手筆落  
落可數平園西山諸老之風流散在三光五嶽間日月  
磅礴河漢經緯吾紫微公實當之南州之士僕將帥以  
聽某讀書涉獵筆墨空疎方青山蕭然水上之風猶若  
意會一行作吏此事便廢間於故牘中掇拾親親長長  
之說見於行事邇來千里民氣覺稍洽和書生不知向  
方能終不迂闊於事否昔人云未識意先感水火流燥  
記吾味久矣教思無窮勿替引之某豈勝惓惓

與曾縣尉先之參

字孟

某自前拜書後回首鴈峰不勝拳拳水口吳權寨來及  
承手書備見繢繢故舊之意百單二歲之姥孟參發揚  
之安序表章之真足以爲衡陽一段佳話某六月朔日  
祖母初度亦及與一城老者相周旋人生七十古來稀  
是以自七十爲始千數百名中其最高者爲九十六延  
此母於堂進趨語言殊覺不衰惜未有過百者鄉間有  
羅提幹存叟祖母去歲滿一百歲某嘗偕朋友十餘人

往拜之當時有詩歌成軸今年又百單一矣此是大家  
諸孫皆儒者提幹登科有福有壽又非衡姪比劉守却  
未知某旦夕亦當為文以自之賴斗絕與湘問久相隔  
適有自建昌來者云五月二日廖恕齋過建昌知五月  
末主人到臺觀上矣司存事首尾闢繫無如孟參在恕  
齋必不能相舍安序權事半年添此繁劇想一旦釋重  
負甚以為喜某於賀恕齋書中已備道孟參一段人將  
爭出我門下此自無說但願足下斂以靜鈍守以廉朴

一如平日則天下之奇材青雲之遠業也。賴事稍簡親老以下俱平安賣出雲庇但有疲於竿牘以一人之寡應四方之多覺甚苦之鄉人相遇者隨分處之亦不至甚相炒中間只一榜禁假託大者歸之臺小者聽之縣或以為得體賴只有出甲一項未易杜絕今春此輩在廣聞某新上皆急於歸就保伍乘其畏向之機近日以免先事諭曉度今冬可得安靖湘中既獲諸渠魁後想道州一帶已無事湘鄉諸處敘攘之風當是久已帖息

茲因專介信筆傾倒薄芹并瀆向風如馳

與曾架閣

某曠不奉狀者累月杜門山居無由四方上下以相從於顧盼咳嗽之末馳仰中得會李文復卿廉知起居之詳甚慰子曰苟患失之無所不至百年間天地不位萬物不育推尋其咎常於患失之私基之間下出其浩然之蓄積與當世之大人論成敗爭曲直言不合艷然竟去榮途引於前禍機怵於後而毅然不變由閣下自

處則本心內事也自惴惴持固者觀之則豈不患此失哉歐公所謂我輩中人敬歎敬歎因復卿歸并介以有請先通判託孤於先侍郎先侍郎以其責歸之架閣事至重也執事不以其弟為不穎使昏名門講好以來涉四年矣中間歲月雖多機會甚少以故告成吉禮猶切遲之獨至今日則造物若有巧於其間者執事當驅馳江淮而某赴闕就道執事卷風雲藏林壑而某恰亦骯髒來歸兩家初意誠不期有此暇也某方尋香火之緣

自分間散而執事氣宇蓋諸公名聲動中朝扶搖九霄  
匪蚤伊莫則川駛月流舟飛岸奔非復有此之暇執事  
終先子之託而某了同氣之責今其時乎區區肺肝已  
具告之復卿并疏其事冀以闢諱幸執事終惠之

回吉守王提舉必

號敬岩

某僻居林薄間望旌麾所蒞遠在霄漢道德朝望蔚乎  
輝光可仰而不可親是其分也迺蒙寵戒令有聞教之  
便忻快何如入冬暄寒相薄適有采薪之憂莫醻隆厚

滋負皇恐謹具狀謝他容參謁并敘區區

與廬陵龔知縣日昇

號竹鄉

自螺水而東望西山廬阜與三江五湖如拱揖知婉贊  
扶輿有名勝宅其間相去蓬弱良覩差池北斗芒耀徒  
耿耿心目爾不自意桑梓幸會牛刀大手姑為此試共  
惟明和介潔之譽此邑不占已孚跂予望之艱難之秋  
得君子之政與拜橐覆之貺滌篆云倣未能躬闕賀庭  
謹具劄子代布忱悃非晚當圖稟謝不敏

與贛縣許權縣

惟廬陵與安成為比郡山川同在吉志今茲遂得自附於鄉黨之末幸甚休甚某往者於諸公間得聞政事一二有司敬謹莫重於獄後世苟簡幾以民命為戲濂溪為小官不肯殺人以奉其上東坡謂今人爭減半年磨勘雖殺人亦為之聖賢愚不肖之用心其異如此頗傳廉明與同州推官事前後照映辱在同里與切增氣銅章墨綬責止空同一同風化姑此相屬奏最匪伊騰太

清凌扶搖錢公之步武也某疇昔學技曾於名門子姪  
畧有相知者獨約履末光未有下拜之日其如傾企何  
適陳文成甫來以為託身桃李之國輒拜此以識惓惓  
陳文并乞公庇也率然上狀未繇參侍仍冀自愛不貲  
之寶以須遠至

賀劉敬德補入太學

名欽號  
絜矩

茲審捷來南浦聲振西雍才名三十年說屠龍之老手  
冠帶億萬計快走馬之脩程儒榮有開士論稱服共惟

驩慶某相期半生聞榜折屐無繇造慶謹奉額函芝楮  
二百千敬為擣捷之助不腆皇恐臨風馳泝

賀鍾有謙補入太學

名山甫

茲審冰闡獻藝璧水蜚聲月旦評中說八義之老手朝  
雲飛處艷三合之修名

下同

與周德甫

為季弟從弟聘

某比者牽率朝從一相遇兩日夜陪接議論之末極慰  
翹企獨恨去之匆匆未遑屬贅耳中間妄欲以二弟相

累陶冶荷不鄙棄許之以相周旋甚幸甚休鄰敵相交  
則有盟市道相質則有券吾徒相與一諾已足政不在  
要約區區也然君子義以為質禮以行之萃郊之幣際  
可而幡然雖虞人之微非其招不往非義無以將禮非  
禮無以昭義交際之道不以節文將之終必有弊况為  
弟子擇師乎此書之所以不敢廢也歲禮之數息壤在  
前無俟贊述官楮一百貫額人送上以少將聘致之敬  
告幸麾頓小弟差劣不可大脫鈴束燈前後早賜垂訪

乃所願望觀德聽教行有日矣尚及傾倒其餘



文山集卷七

欽定四庫全書

集部

文山集卷十八至一

詳校官庶吉士臣李傳熊  
主事臣呂雲棟覆勘

總校官進士臣朱鈴

校對官主事臣陳墉

謄錄監生臣張泰

欽定四庫全書

文山集卷八

宋文天祥撰

書

與文侍郎及翁

號本心川人後參政

某久曠起居遞中連得誨帖仰佩至愛邸狀間屢見丐  
祠尊性樂在簡淡急流勇退仙風道骨人也但老文學  
為諸儒典刑真侍從為朝路風采上必不聽去耳舍弟

璧來拜侍辱以家人進之得與教誨王成實受尊賜某  
向在湘承命問一路書籍後某去之匆匆諸州來者不  
齊今約見存可二百冊贛書為一萬九千三百餘版亦  
已陸續印背別容一日專兵齋申某治郡以來書生迂  
闊之說頗有效驗祖母六月生日集城中內外老人自  
七十一至九十六為男女一千三百九十名犒恤有差  
老者既踴躍而少者始皆知以老為貴禮遜興行詞訟  
希省又風雨以時早禾甚稔晚稻亦可望諸縣民皆樂

業無持梃為盜如宿昔者稍逭曠漸皆尊誨所逮宗老去國後今寄居何處想甚清健恥堂先生居雪川近況如何批示幸甚遇郵拜書不宣備

高恥堂名斯得川人參政本心癸丑榜眼後來廬陵省其叔可則先生時年十八邑校簾試全篇論題曰中道狂狷鄉原如何冠榜遂通譜焉道體堂謹書

與楊大卿文仲

某頃繇岣嶁申敬羣玉之府爾後僕僕西還為空同之役一息半期海山一碧秋風凌凌翹企不勝五雲紛郁比審疏榮文石晉武頌臺制作一新搢紳交慶伏深歡抃某官貞元朝士西學宗師玉雪照天寒露清冰之操璧奎行世懸黎垂棘之光屬時訪落朝有老成真天聖之著龜元祐之麟鳳也入告辰猷條天章十事寘之兩社以福溥寰某顧顙延睫烏哺萬山間於芻牧何補亦惟念父杜母之政是則是效蒙被吾味至于今茲璧弟

來修門得親炙典刑以濯去舊意漫潤新雨愛其兄施  
及其弟此感殆未易名言也念間起居輒此馳訴空明  
并候所以教尚祈金玉式副前禱

趙戶部平遠

某娟娟秋風中若有天人噓新雨而沐之者眄搖落之  
繽紛把鉅麗而舒卷則夏六月錦闈蛟龍宇也西平有  
子惟我有臣春秋書曰季子來歸國人貴之麒麟游泰  
畤鳳凰集阿閣之候乎朝廷清明再天聖元祐對揚訪

落為東諸侯先洗耳琅琅為天下誦之某為養承乏于  
此何補芻牧所以朝夕其民亦惟親親長長之推庶幾  
萬一云耳諸邑大夫之相承通融一家痛痒一體繙衣  
之宜兮若田君尤所謂用吾情者執事惠以所知於此  
見田君益奇而某得納交幸也結幽蘭兮延佇此意襄  
積專猷嗣箋

某繇空同起晚海山虹氣緯霄靡蹕不照吾石樓大地  
一粟也輒倚空明來洞起處惟偉人照以度外某惟明

世雜選英賢以綱紀生人金玉新政豈弟君子來游來  
歌經緯乎文武轡輶乎風雲伯墳仲篪叔出季處無非  
吉日車攻間真實經濟脣指西北本在中書植之風聲  
旂常世世某拭目延和殿新綸之下烏哺且半期餐每  
祗益媿耳旦夕歸命香火奉輕車歸即所安居中引重  
允然終惠之望泚筆廉泉馳訊碧落豈不嗣音更僕以  
請臨風無任悄結

與陳侍郎伯大

號篤齋

某熏沐薇露闢敬高寒惠徼五行俱下之曠某玉峽撐  
空水沙一碧神仙人弭節其間春花秋竹鐘鼓餘閒真  
神龍深臥處也咫尺五雲不得時候猿鶴則吏鞅實丹  
黓之夜瞻明河自訟不置仰惟一代翔鸞神駿騰踔凌  
厲駕寥廓而振汗漫也舒為慶雲卷為清飈其磅礴帝  
所則福在海宇其夷猶山澤則望在廟朝六合一握天  
地一瞬也厥今訪落廟謀雲漢為章詔書出庭和公且  
兩社某嘉與顚顚額手某區區烏鳥之情俯仰半菽枮

陰蔽芾實持纛之宿昔拊摩凋疲曾微芒忽而髮皤皤  
間亦念家旦夕皈命香火奉輕車即所安玻瓈一江光  
氣上下某服媚之無斁蒞禮寄之九霄間忘其蒙瀆倘  
沐涵茹幸甚

與宋衡州

某介倚心知不敢徒亹亹西曹道邊幅首祈紓省某自  
抵空同兩厔輶翰忽殷勤以寫心折芳菲其寄遠春風  
千里著人如醉至如骯髒之作不足乎楊繅藉而琮璜

之大好大慚退却三舍顧區區定交才數月宇宙意氣  
不啻平生忽飄風其相離不勝回首明河一方如耿耿  
何某官永輪金井雪柏霜松西岷太白之精九霄經緯  
南平莫邪之氣萬丈光芒馳玉軼而坐朱陵轡華絲而  
當銀漢洗鯢鼯之窟穴飽鴻鴈之稻粱已收暴公子之  
威名小燕汲淮陽之清淨綠綿方底竚垂岣嶁之雲絳  
幘曉籌催傍舷稜之月某視郡印已十旬初至如人家  
風雨四壁逐處經理久之方成綸緒日來甘霖應期粗

慰農望想福星所次時雨膏之早熟必已可卜恕齋新  
上以同里而講交承解后非偶然者遠想楚觀五雲衣  
冠玉立不任馳羨采采澗芹薄旌一髮不足當莞頓欲  
往從之湘水深三復是詩神爽飛越

與知江州錢運使

某日戴五雲苟且為治自省其私則統部中一丈壘也  
等威有截不得以杏園宿昔自詭乃者辱不彼賜之書  
草本吾味篤實嘔喻畧分際之崇卑申度外之縕縕言

念君子終不可諉兮某惟濫浦控上下流古用武之國  
陶士行庚元規諸公藉此以鷹揚江表虎視河洛乃今  
天移福星作鎮此土激西江蘇舶轍屹長淮而斷鯨波  
作宋長城真北平變化傑魁人也東南金湯施及虹翠  
隸也受賜多矣某私竊自念贑山長谷荒赤子龍蛇雜  
襲而處芻牧之責大恨不任而欲以詩書操强暴衣冠  
化力劖書生迂闊而不至敗缺者幾希明公回首曲江  
風誼一世果不以九州四海之人例視之則鞭辟其不

迨包蓄其未間如天之福也某頓首下風以請謹馳一  
介上詞起居薄采空青以自附於潢汙有敬之誼犯嚴  
怛然控露潦畧

某撫搖落之續紛泝空明而延佇龍光射牛斗福星出  
虛危殆一夕九起也某之為郡寔隸照臨月詞有典當  
不懈益虔寧不嗣音童瀆是懼五雲九霄凌倒景而下  
空同劖為清冰溥為膏雨地雖辟絕而天人顧復之益  
深豈無他人不如我同味之下墳篋五老之嶙峋襟帶

九河之汗漫要其胸中磊磊落落倬彼雲漢為章于天  
者曾未究也忽而身作長城手提半壁嘉與一道桑麻  
而菽粟之西人之子幸則幸矣然大轡如濡王事一方  
孰與入坐中書經制天下聞延和殿議召公矣某強顏  
芻牧何補毫分目前四境無虞年穀粗豐皆澄清餘潤  
所覃也區區素餐是愧倘使者猶以故人未即舉法旦  
夕丐香火奉輕軒歸即所安徼福年盟尚終惠之遠道  
寵賚雜遜充庭翠玉春暉緹襲無斂謹具劄申聞伏覩

新綸專容郵賀

與廣東曹提刑

某曉挹薇露注之赫蹠上之東壁府昭有敬也某惟紫  
微雲烟衣被炎海若經若緯紛郁輪囷施及虹翠間山  
媚川暉浩蕩何極隸也旦旦稽首欽以某官才足以截  
蛟剝犀文足以鏗鯨躍鳳力量足以扶巨鼈之頭屬東  
都韓呂家聲猷奕奕經濟如許更當坐玉闕為天子當  
一而綉衣霄漢尚逶迤五嶺間邪袖青冥之鉄鍔行黃

道之星辰方底綠綿已落天半某不戴五雲奉重護空同小院烏鳥私情自揣逾分起視四境山長谷荒赤子龍蛇未易帖服越雞伏鵠卵何以充濟邇只臺容如面鐵壁某恃此無恐郡中舊例以八九月間申嚴編氓出甲之禁往往此時允儔陳脚已動履霜不戒堅冰奈何近者妄意預行曉揭使家至戶曉人人知所避就今年僥倖梅關以南無一草一木之驚僕之責始塞榜檢求教吏師尚不彼發藥之某比為五羊羅僉判拜書強聒

持寸建撞巨鐘多見其不知量飛剗公車不俟終日明  
公有意天下士如此感拜盛心謹馳一介修詞節下謝  
已往而祈方來亹亹如也東望芙蓉玉立萬仞伏楮神  
馳

回汀州陳守

某惟自古民流為盜有受病淺者有受病深者淺者調  
其氣血時其餒飼不待針艾而病已除昔之人有行之  
者龔少卿施於漢之渤海是已深者參苓之所不能可

湯熨之所不能瘳則大承氣湯証矣昔之人有行之者  
子太叔用於鄭之崔苻是已今者使部弭盜一事鼈峯  
先生豈弟之心高明之識見諸已行者其成效固班班  
著矣賞一人而勸者百罰一人而戒者亦百春風之和  
秋霜之栗施及鄰境胥有嘉賴特在更酌其受病之淺  
深而斷以行之是殆非浮想懸度者所敢與知也贛之  
為州雖曰以五城兵馬鈐轄繫之衝顧建立司存本意  
不過為贛民出他境使郡將得行通制之權要其實則

依然一列城也若有所徵調下郡稟承實視朝命謹布  
腹心以謝委戒之辱橐結恐悚

與趙大卿孟傳

號松輕前  
知贛州

某汲廉泉澡粟尾通憲憲主書吏貽初好也某昨從湘  
花間奉盈尺牘一舒泄其宿昔雲龍之私明河七襄流  
麗空碧地中之山謙水上之風渙十襲九緹至今耿耿  
光氣蓬萊水清淺縹緲環佩渴心湧泉一日千里某茲  
者共審玉宸渙寵金掌升班維城維翰維藩磐石大宗

之績厥貢厥包厥篚綱維六府之司禁簾雲開神塗風  
動伏惟慶抃欽以其官祥源異稟若木殊輝綺綉揮楊  
汝陽天人之相龍虎變化北平魁傑之風勢侍從而厥  
承明經駘盞而出駿姿公不淮海之薄上為宣室之思  
玉珂金鑰之玲瓏花綬藻衣之烏奕徑摩馳道渙周卿  
六命之頌不出都門竚唐相九人之拜某頃單車馳峋  
嶢下鶴髮重重一夕九起效贖洗馬歷歷陳情君師天  
地之造為擇便州夫守奔逸絕塵乃使隸也瞠若乎其

後雖鴻燕差池不克面拜龜組然天開百世之好山川  
其忘諸惟是求牧力綿未知攸淑一規一隨賴有柯則  
在我愛桐鄉不隔風雨肘後寵靈不彼而惠綏之此固  
憩堂中父老之所共望賜者也謹具劄子申詞起居未  
諧良晤願言金護玉持式副前禱應舊治要來敢請其  
凡

與前江西趙倉與端

號端齋

某澤露焚蕤闔敬五畝花竹下盡脫犢棄惟高明垂簷

某沐滌塵舊雨今十六七年立冀部下風則又六年僕以荒落之資跼伏於青原山中如商鉅馳河遠莫致之先生如驚雲游龍舒卷九霄其步武不可俄度宜乎其欲往之而瞻望不可及也區區九十之親就養空同今綉衣洛社中輩行也間得訪問獨樂起處先生玩心神明之表游目日月之上蓄為清氣蒸為甘霖一日舉而措之沛然江河孰能禦之我有宗老為國之榦訪予落止以公歸兮某半生出處無足為明公道宿昔受教所

以護持其元龜者至今不敢渝世人自有一種毀譽道  
眼自有一等高下先生度外大觀謂其人竟何如也某  
因謁趙令君居中台之里又出門下值其良使亟衰此  
墨少敘戀思臨楮馳訴

與吉州劉守漢傳

某澤穎拔萃寫志志銅壺閣下貽鄰好也某日從郵置  
得滌我私盈盈一水間鼓宮宮動鼓角角動精神流注  
絕出筆墨町畦芳菲菲兮浩蕩何極欽以其官吐吞玉

檣之風烟披拂青藜之光燄卿雲甘雨舍天地之至和  
古柏蒼松炯雪霜而獨立小駐星河之棹頻分江國之  
符春靄袞禱神螺繡黻雨籠絃誦振鶯漣漪鈍為鉛而  
頑為廉瘞者膏而憒者醒兵衛森畫戟小宴清香衣冠  
拜紫宸佇班黃道某宿盟園杏又尾朝花蒙霧一塵稽  
首錫類竭來空同密倚五雲多處楚波之及晉魯柝之  
聞邾川媚山暉沐浴令雨則所以講信修睦者奈何以  
簡陋廢采采澗蘋以明有敬玻瓈一碧此心俱東

某日摩挲空翠端飭側厘以進之集古主書之側蓋於  
門牆辱好有三馬園杏之齊盟也朝花之末至也三間  
風雨託於君侯之土地也而豈但曰小國之於大國也  
有交鄰之道焉謙齋先生不以小人之美芹者為僭而  
察其明有敬之私是能容之其弘多矣介使踵來辭曰  
報聘庭實維旅芳菲彌章是何君子施禮之周執德  
之信而僕何以當之抑傳有云長者賜不敢辭取數之  
多亦祇以媿贊去吉一水三百里而氣候風土習俗事

事不同未春已花才晴即熱山川之綢繆人物之伉健  
大槩去南漸近得天地陽氣之偏看來反不可以刑威  
懾而可以義理動書生出其迂闊之說嘗試三觀聽之  
間稍覺不變奉令承教於君子尚願維今有聞以淑厥  
後廬陵之政識與不識皆云一佛出世山川出雲時雨  
流動此為霖之善者機也民歌路謠徹聞京師天子明  
聖恩光言遠某雖不敏尚能取皇甫公韻歌和之占謝  
之次寫其輪囷寧不嗣音如此江水

回吉州趙倅

某首春攜便符歸省道五臺下華裾葱蒨照我征衣雪  
跨冰懸灑灑清味至今彷彿宵相間投膠沸糜不克闌  
屏星西來以修賀上之禮琳琅金薤忽落虹翠三過跫  
然以喜某茲者伏審緹軾行春畫堂開曉袖槐雲之五  
色俎樓月之千峰共惟歡慶某官瑤簾簫鐘秋濤瑞錦  
駕玉虹垂蒼兕凌紫清而上之固其所也鞚鞚佩璲乃  
翶翔石泉松雪間邪輿藤簾綉小燕屏題方底綠緹又

看環台某視郡印十旬云云皆簡素之賜也自省於涓  
曹正負不敏圓穀鄭重此禮奚宜至哉鯨錦卷還猶有  
餘媿折寄芳菲今雨何厚頓首拜嘉謹謝將命尚容專  
致廈成之慶

回袁州鄒倅

朱明逾半南薰之時共惟禱祚行春旌旗麗曉有燕有  
翼某對廉泉飭側厘東嚮以謝主書吏某頃叨節南馳  
得符歸省三峽烟雨中一再獲拜瑤林瓊樹之側亹亹

吾味我心寫兮執袂幾何時明月千里惠而好我錯落  
華音下照虹翠赤脚踏層冰忘其執熱也共審龜臺借  
重鳳岳疑清時雨誦絃和風條教伏惟歡慶某官東山  
芝蘭之韻北斗梧竹之標朝發輒兮扶桑夕攬轡兮玄  
圃識者已竊遲之兩樓山水能久著神仙人邪竚文組  
之即真以介圭而入覲某禊前一日奉重闈抵空同下  
既三閱月公事稍清得小遂半菽歡錫類之餘也實蓬  
勤斯芳菲襲子新雨洒濯感在下風采采一芹效臞隴

寄非所以報也馳遡一方

回臨江婁倅

夏鳴仲琯良苗懷新共惟風月滿樓江山入句百神饌  
介某焚蕤淪露專謝中消若兩廂觀飫五鼎尚藥無庸  
為仙人瀆某於東都韓呂家鼎鑄獨無耳乎頃一節湘  
行獲衡陽從廣文君亹亹簷花情味甚春容也清江之  
上韻頑飛霞獨不得四方為雲追軼清絕琳琅金薤光  
墮玉虹執熱以濯我心寫兮欽以某官永壺玉露之冷

冷瑤林瓊樹之英英黃琮蒼璧之熒熒上之清都盛之  
紫微便當還家擅本色石泉松雪可久為麒麟係耶方  
底綠綿自天子所某將指罔功叨恩便養空同小院粗  
可從容半菽歎皆商燾之賜惟芻牧之才單龍蛇之俗  
險凜乎未知攸濟渠渠遠道頌不以規既謝下風尚沐  
新雨畫堂高處槐桂成行春蚓秋蛇覺我形穢明公不  
以覆瓿而顯設之鉅軸爛然一見頽發謹復將命不勝

馳  
訴

回隆興熊倅震龍

某撫今雨露清風其契闊未有甚於此時者也色絲  
於浦碧追流水於爨焦其慰浣有甚於斯今乎澹圃先  
生以冰懸雪跨為風骨以鸞漂鳳泊為文章以規圓矩  
折為政事挈其堂堂著之高處以經緯河漢舟楫江濤  
萬夫一喙也陳仲舉千載風流乃獨與歲寒結印倏霆  
轟飈怒而起有不磊磊落落者乎時來則為當仁無遜  
某兩別十年無非俯仰林鳥之日祖母行年八十有七

切切便養承乏此來公朝篤棐人紀之造而諸君子錫  
類之餘也第五閱朔于此塵而入鞅而出於民無緣分  
補行矣丐一縷香火緣奉輕軒以歸亹亹襟期明月千  
里折寄芳菲厚意不敢不拜薄將石間一髮非所以為  
美芹也廬陵廣文玉戛金鏗長沙識衡山簿猶昂昂雞  
羣之鶴中峰有以服乎兩峰觀者為此膽慄何啻簪盍  
上下慷慨目送征翰臨染馳去

與楊縣尉如圭

其他日上下紫金間草木吾味未必無解后之雅者也  
廬陵少仙之庭數有英游發輒其間而君年又不可及  
當官風采東西行者亹亹誦言知為清修知為縝栗培  
風慈飛霄漢一碧跂予望之某誤恩便壘夢繞松楸間  
伏戎于莽有乘虛而干法犯禁者霜臺遽以煩執事知  
敏手為可托也寒泉白骨蒙賴方新惟牽帥從者重愧  
重愧草草持恩高明臨染無任

回唐書記

某一節湘行得挹寶烟至氣於芙蓉池渌間亹亹吾味  
歡如平生岸花催路吹絮滿衣襟其五雲落我店月厚  
意久不報所思遠道回首悵然執事以瓊瑤玉佩照映  
東西鸞凰先驅朝闕風夕玄圃可也赤雲瑞氣黃花歸  
期當仁勿遜某花朝前四日抵雲舍又十日奉重闈沂  
灘而上禊前一日抵空同郡事稍簡俯仰半菽皆商燾  
賜也江湖寥落鴻影參差安得素心人相與數晨夕每  
誦此詩明發不寐輒持只赤小澣我私采采澗芹臨風

如結

回黃強立

某薄游空同縕縕半菽故人知心千里寄瑤華音以縹  
藉之讀之宛然促膝接語也強立以排淮決漢之胸行  
駕風鞭霆之氣鑄為雄辭能使京師紙貴新豐舍中誦  
天下事一日騰上風聲千載某來此訟簡事稀餘力可  
及故讀四境倍稔絕南剽之跡皆五雲所照映也久缺  
報襄輒郵專筒薄將聊奉一笑

回文教名寶

某久溪亢宗無從通譜璧弟幸托年盟雲杏集中不知  
曾得納拜否己巳之歲千騎過廬陵有意來山中時某  
適赴鶴書取愧薜荔失此交情悵然一方之感書來空  
同陳誼天出欲往從之湘水深令人亹亹柳子厚謂南  
方之靈鍾而為石故有多石少人之諭某常以為未也  
地氣自北而南古有斯語意者人物之數斯文之運亦  
莫不然王參羅帶之勝中州山川所未有也磅礴鬱積

而振發之以其時可矣吾宗大寔當之乎今業方來雲  
湧川至樹之風聲快覩談談某半生落魄無足為宗盟  
道去年單車馳峴巒下堂有重慈白雲間之陳情至於  
一再遂授今壘闔門就祿亶出過數力綿求牧未知向  
方宗丈宦遊海外坐隔一關一介相先是不以他人待  
同姓者委貺所及拜而受之薄物非所以報何當嗣音

與胡節推幼黃

某他日盤之中辱玉山朗然照之舉帆凌斗牛掛席拾

海月已占吾成玉堂堂於此時矣空同落葉間快讀千  
佛喜見榜花雙峰巽山嶙峋蒼翠布濩繆鶴何盛大如  
之國家三百年代有英傑樹之風聲五緯聚奎之符彪  
炳未已滅沒草根者固復何限吾成王一大振起之青  
原剝空忠節生氣是則草木同味也喻計畫紡娛雙親  
時某當以奉祠歸里尚從鄉稚耋候馬首遮慶茲嬖赫  
蹏寫此茂悅亹亹薄將祇瀆

繳奏藁上中書札子

時吳復  
齋當國

某惟軍國萬微日至黃閣不敢為竿牘區區懼瀆威峻  
惟鈞宥是祈某頃罹人子之厄曾拜仁人親親之恩感  
激榮光永矢無斁不自意今春伏遇先生袞繡來歸為  
國柱石遂得密邇陶鈞以庶幾一日履屐之役幸甚莫  
大先生當國以來上迎聖主悔悟之機下慰蒼生蘇息  
之望所謂垂紳不動聲色而措天下於泰山之安先生  
有焉乃一日伏讀明詔許中外臣庶得實封言事皇心  
光明言路軒豁恭惟啓沃至深也某私念今事變至此

衝決橫瀆使宗社有不測之憂者誰實為之病根在內  
膠結不去終不可以為國是以積忱具書先陳其愚慮  
之一而痛哭流涕終之人非不知愛身何苦如此冒死  
今日之事急矣懼其至於一旦則亦不免於死也惟是  
言輒如毛懼不足以感悟天聽尚賴先生徇邇國之心  
出回天之力以措世道於清夷光晏之域某九殞無悔  
謹繳奏藁具申伏惟鈞慈俯賜鑒察

賀籥書樞密江端明古心

某夏五之月伏從下土切聽朝命共惟天子蒐選洪儒布滿侍從而先生以海內達尊居然冠文昌之首僕自惟念正人登崇天下誠幸誠賀不敢以草野有踈輒奉狀以為斯人之慶記史登錄及徹巖視私心欣喜莫可涯涘山澤深遠與廊廟本不相接一日問巷風傳歡呼則謂先生以某日踐政地參樞筦主上聖明君子終為大用莫不舉首加額以為其相天子活百姓遂在旦夕以一方推而放諸知懽欣交通人情莫不皆然人望有

所宗而斯民之譽猶出於直道僕為之舞之蹈之中夜以思不能成寐夫以穹壤之大人倫之衆而先生之進大夫士庶民皆欣欣然相告如其父兄親屬之得用將有所利賴於己者此其心豈千金之所可得而家至戶曉所能同哉我朝先正得此氣象惟前有范文正後有司馬公范自諫府以來以言事傾動中外後來出帥西邊入班兩地岩穴之士慕下風而望餘光蓋皆延頸企踵以庶幾其一日之為相司馬居洛中十餘年當時兒

童婦女識與不識競曰司馬相公元祐初衛士之感泣  
都人之遮留其所由來者漸矣非一朝一夕之故也范  
公得經世之望司馬公得救民之望嘗恨士大夫所以  
積望於平日得望於當時蓋幾世幾年而後得此二公  
有心厭服天下之心口聲動時人之耳目而范公不及  
用司馬公不及盡用天之未欲平治天下其如之何哉  
今先生早以言語妙天下中以政事動中朝後以氣槩  
風度上結人主之知而下為四海所傾慕則先生都范

馬之望於一身蓋二公之後又凡幾世幾年而後得此  
天下之所以責望於先生者豈與伈伈睨睨笑與秩終  
而其同草木俱腐者同日而語哉方今西有叛將東自  
逆離而江淮與強敵為鄰強兵富財之道無所於講主  
上不得怡宰相以為憂其顯證莫過於此而學士大夫  
私相擬議痛心疾首以為方來無窮之變伏於不足慮  
之中而發於不測而不可禁者其幾尤切凜凜天下無  
事則代天理物之地猶可從事於牽補架漏以庶幾不

至於敗缺不幸搶攘憂危之間倘非碩德重名積孚於  
人心一日舉之以從民望則鎮服危疑收拾渙散精神  
氣勢未能一旦動天下之聽也今當揆身定大亂莫安  
方極不敢自以為功而方嘉與天下之賢者共圖久安  
長治之策先生從容於廟朝訏謨於帷幄則當揆所以  
隆體貌敷腹心未能或之先也鄧侯所以舉代於平陽  
茂弘所以深器於安石其為天下國家計者甚悉豈曰  
身為功業而已哉則夫先生之一身其關繫於方來之

世道誠重且大而閭閻之內父子骨肉私憂過計以為  
脫有倉卒則所以寄命而幸全者非先生疇依然則先  
生之望近世以來絕無而僅有者將茫馬不及為之事  
先生將來雖欲逃之而不為其亦何辭以謝天地神人  
之所期哉僕鄙野無足道又執方不通於世修門之書  
每視為甚重而未敢輒發其於先生獨亹亹不倦自  
天下之公而言則僕之喜談樂道與人情若不相遠自  
一身之私而言則僕誠何人而辱先生特達之知此其

所以伸紙行墨樂為四海誦其情而不自覺其僭且瀆也伏惟先生少垂察焉

某仰惟三台熒煌之精貌在雲漢下土之人夜詹頌頌曾無羽翰可飛遙於經天光耀之側間者不揆雖荒繆之筆墨時得以上登消史而觀道德聽教誨自謂未有疇昔則左右亦以其人為何如先生度越常情嘉惠後學采於窮約之素以為可進而教之廬陵之士凡來謁先生者未嘗不深念其姓名至於造化人物之地先生

所以提撕薦進使之得以齒下士於朝則既有日矣乃  
者祕府之命從天而下空山不穎之蹤跡一日有聞於  
人自宰相鈞陶而言曾無所偏私而其心口相謂山澤  
之人何以及此是蓋有所從來而不敢忘也當泰之世  
必有均調皇極之輔深思遠計周及人物雖遐遠僻陋  
如不肖亦使之無所曠棄九二曰不遐遺得尚于中行  
今當揆以之泰之未成也必有一陽為之先而後衆陽  
之氣類隨其汲引以進今正人滿朝大抵以先生為朋

來之倡至於晚陋亦得依乘以前初九曰拔茅茹以其橐征先生當之屯之六二曰匪寇婚媾女子貞不字十年乃字二嫌於初不願為應徘徊不字至於十年某雖不足語此顧惟却而從之者衆矣蓋至今日得先生為之宗主奉命驅馳惟此時為然某他無能為役至於守其本心不與流俗為軒輊以求上不負知已下不負嵬瑣之所存則或可無愧怍於此尚惟先生終敷之某欽惟新命亟應祇赴顧以未服外庸不敢即造朝班區區

欲俟宮觀兩考批滿日徐拜恩渥蓋已額狀控於朝矣  
諒先生當許可之遙睇清崇未即詹侍輒奉狀臨拜懇  
悃

與前人

時以前宰相帥湖南回

某半生出門下幸甚乃從湖南以一節奔走閩部去年  
此時拜長沙壽星甫償分願潭衡相望郵置信宿奉令  
參教王事一家以父兄師弟子之情而行於連率方伯  
之際湘人或云前未見此比而某也受賜為不貲矣先

生之入湘也某後三數日而來先生之出湘也某後三數日而去何其步亦步而趨亦趨也璧弟於臨江候迓使艎獨蒙一再予進所以愛之誨之不令兄弟無間然者曾不自意先生及豐城以下乃有門內之戚盛德大業如山如河存神過化之學先生其講之也熟矣某所得郡去家一葦而近奉八十七之祖母與老母俱闔門長幼無慮二百指悉從官居糜費俸粟是皆公朝錫類之造郡事頗簡四方無竊發之告日來風雨亦以調順

使苟祿之日得免曠涼非大擣之賜而誰賜秦益四者  
久焉逋誅湖湘未了公事殊切介介比日來連得舊同  
官書間計議駐兵永明誘益四而生獲之為廣兵所奪  
尋且告斃經司取其戶寸斬以謝兩路先是田定二據  
平原秦小九據鹽田為秦益四聲援引益四以屠永明  
正田定二之為也柯倅權全州首禽二兇磔於市自二  
兇死而益四遂不能免先生一番出師其終條理如此  
益四不死非但遺患南方其於根本關繫甚不細且得

竣事功之在彼在此無足計也蕭獻可失其令嗣如墳  
廬陵生此士有數可為痛惜詹皇泰階中夕九起薄言  
顧寫有懷忡忡伏乞鈞照

與吉守李侍丞

芾號肯齋

某居廬陵南陬蓋受塵之最遠者也其於當世人物無  
所交際惟從田間側聽輿論則天下伯淳雖隔在僻遠  
烏得不聞風稽首吾州自前守去後無主宰幾一年舞  
鶡號孤郡政泥濁斯人無幸亦云甚矣執事不鄙下土

惠然此來天開日明是在今日某實為鄉國稱慶仰籍  
裔雲在上區區非才叨恩入館極知負乘月朔嘗造州  
闕印申免時聞千騎且入閣某遂止旅間伺候攀迓前  
茅繼聞少展適頭目受病旋暈不可耐不得已載舟兼  
輿以歸相距兩月交臂失之不敏之咎其當如何方僥  
倖平復造謁以敍悃愞幅願駛及門寵授翰墨山林踈賤  
之人乃得殊禮郡大夫之德為不可反而某缺典之愧  
益加多矣祇誦來辱避席再拜有懷輪囷具嚴初積謹

具劄子繳申職事之記所有台翰謹謹歸璧示不敢當  
也修布草率顙圖侍見以謝

回廣東曹提刑

伏以炎日正夏薰風自南恭惟某官玉節霄明華絲雲  
度穆清簡注穹壤棐扶台候動止曼福某淪穎廉清通  
箋奎碧惠徵書月却立下風某遙企芙蓉上挿牛斗儼  
繡衣之持斧屑璫靡以為糧弘鋪太和勿問元吉某欽  
以某官簫鐘鏗戛玉尺端方蘆阜青蒼毓白石清泉之

勝北斗魁傑捷碧梧翠竹之標或弭節於人間或影纓  
於帝所既盤礴而鬱積復周遊以逍遙流水青山奪司  
馬尋春之志荒崖絕島行濂溪澤物之心欽哉刑之恤  
哉使也言有光也樓臺映白日絲轡小馳衣冠拜紫宸  
綸音遄下某起觀宣夜跂敬明河方濶焉北樹之題乃  
贈以南金之寵楚然三復愧此七襄某頃綴楚軺每懷  
綿來牋天從欲回邛坂之車便地養親得江南之舍永  
惟錫類不隔善隣嬖積阻心熒煌在目某袖分羨露才

劣錦雲雜下俚於九成發宗工之一莞喻瞻蓬翠工輯  
蓋珠氷桃碧藕之清涼福英祿華之郁穆臺容所戒鞭  
影是趨

回陳侍郎

某伏以回車印坂請自效於林鳥得郡江南取已捐之  
竹馬綢繆錦覆緹襲袞華恭惟某官麾斥八極之風雷  
卷懷九天之星斗古靈袖中之藁屢薦時賢溫公洛下  
之評不遺人物遂使忝求芻之寄從而諧啜菽之私某

半竹奚堪儼花甚寵想五畝青山之樂願請訂金懷四  
愁明月之詩曷酬贈璧謹具劄子申謝伏乞台照

與湖南交代廖提刑

某汲濂香裏側厘裔态怠于主進吏昭交好也首祈紓  
省茲者伏審濡絲星轡弭節霜臺紫蓋撐空閑雲烟之  
五色繡衣立漢灑冰雪於九州號令一新江山胥動恭  
惟某官金井玉淵之丰度簫鐘瑤虞之聲名老氣崢嶸  
吐鼈頭之山碧清文流灑貫龍影之潭星凡踐駁中外

以來皆推行忠恕之學惟刀劍狃楚氛之惡賴旗旄指漢坂而驅于疆于理于南來宣王命其刑其罰其審曰惟民中汲湘水而滌瘡痍詔衡雲而燭幽枉禮樂遣使臣也於昭原隰之光袞繡歸我公兮遠任朝廷之重某頃從岣嶁下一拜狀後繼得旨以臬事屬之宋史君某遂於正月末解維而西先花朝之四日抵雲舍禊前奉重闈至空同上俯仰半菽皆齋素賜也第念夙緣結習實開衣冠百世之好乃不克迎拜馬前面奉龜組江海

契闊有足念者近得之東西行人始知嚴節前玉節道  
盱境以時考之此際久建牙楚觀上矣某不勝為湖南  
一道賀舞後木人蕭然音節納之錦覆過者化之亦以  
自賀也某春杪得府第所遣答書仰佩篤敍數月念念  
嗣音相望次寥邃坐不敢慈想建臺有倣謹跪下風傾  
此璧積臨拜無任馳泝之至伏乞台照

與前浙西安撫李大卿肯齋

某頃從湘花間解維而西也故人意厚掉酒壺三十里

而飲餞之風飄飄兮吹衣芳菲菲兮襲予响喻篤綴一  
何勤也回首江空明月千里因念向留楚觀望午橋鐘  
鼓不隔簷陰從容玉塵曾不能以數數矧今去之汀洲  
杜若間蓬弱三萬不趨明河在天瞻仰夙夜如此悄結  
何某共以某官懸黎垂棘瑤簾簫鐘崢冰雪走雷霆精  
神麾乎八極沮金石諧韶濩文采被乎五音維今江濤  
正須人物外之而北門筦鑰內之而西府樞機會惟老  
成具有經濟青山五畝未容寄傲之深黃道九天佇看

傳呼之近某不承商燾先花朝之四日抵雲舍入十日  
奉重闈泝灘而上禊前抵郡抵賤事乍入沸糜不免轢  
轢既三閱月遂就簡平親老安健如常半菽俯仰皆錫  
類之及惟起視四境山長谷荒赤子龍蛇未易帖服商  
鉅馳河凜乎其未濟教思無窮惟勿替宿昔重訓飭之  
泰寇一段某未了事而去日夜念此半年師旅數州抒  
抽為空疽根仍存憂曷有極今聞罪人斯得黨類悉就  
殲夷我愛桐鄉履齒為折顧撫摩凋瘵鎮定危疑湖嶺

間方來正欠工夫耳洛中花竹平安悠然長思當必及  
之某數月念念專礪立起居及今方走一介不敏甚矣  
未繇佳晤暑氣方服願言金護玉持以副蒼生之望孤  
臺有委一唯鞭影所向某臨風馳訴之至

與劉吉州漢傳

某介恃薄雲之誼忘其爲瀆僭有願陳吾鄉歐陽巽齋  
先生講學天出從游滿門登科三十年獨處環堵晚見  
召擢一再登朝先生居之淡如也其修於家終日清言

接引後進未嘗為儕石謀捐館之日橐無贏貲諸生為  
集喪事悠悠人生惟死乃見真實嗚呼先生之風可使  
懦夫立也其子沒字資深世先生之學頽然布衣禁路  
諸公每以鄉先生歿而無澤為闕典有欲從化地言者  
人情好德信不相遠先生不以貨財遺其子而資深亦  
復能守拙甘貧酷與乃翁相似區區謂文獻所屬吾輩  
當相與輔成之大監樂善若不及又於巽齋為庚午同  
朝儻念其孤侍分廩俸月資送之使先生有子不至乏

絕非惟使為善者知勸而名公念舊下士之盛心所風  
厲遠矣某旦夕亦謀具辭幣聘資深至郡齋庶幾前輩  
之典刑斯文之宿昔念同志孰有如門牆者故輒以書  
至焉當暑蒸聽慚汗瀦流伏乞台照

回兩淮制使李端明庭芝

伏惟龍虎魁傑手提鉄鎌重鎮東郊淮山崇崇江水不  
波施於南土隸也踴敬階符等威有截不圖親灑袞翰  
賚之榮光下土伏讀感激某仰承寵戒信豐趙宰真古

大臣勤小之威心趙於某同年宿相厚今又得以郡邑  
聯好事結習非偶然矧知出自晉公門下他日稱吾  
榜得人有所受之矣謹具劄子百拜控謝藁秸萬罪伏  
乞鈞照

回岳縣尉

惟中興之初先武穆王手扶天戈忠義與日月爭光名  
在旂常功在社稷天報勲勞克昌厥後雖百世可知也  
縣尉生北平龍虎家而又偉然植立誰不知敬幸出結

習乃託一日之嘗僚刊諭批厯亦既欽承遠畀鱗緘為禮過矣

與洪端明雲巖

名熹

十歲在湘中專人詣越拜起居過沐報教以門牆一介之舊撫問所及勿替引之相望廊寥感戴不可言喻繼閱邸狀欣審端殿陞班安車就第于彊于理既了旬宣某水某丘逕歸遊釣恭惟驩慶欽以某官中朝者舊前輩典刑早歲驅馳持國子華之並出晚年脫灑盤洲野

處之所無今世浮沉畏途不知止足者勿論固有掛冠  
請老欲一日婆娑里門而不可得者先生袖手版還丞  
相天目山中逍遙野服獨立於得喪寵辱之表真天人  
哉左轄頗虛上方側席只恐禁中朝出傳宣天使夕至  
未容公久作碧山學士耳某堂有重慈今年八十有七  
昨者將指而出牽於行路鶴髮不容迎養歲晚力扣化  
地乃畀麾章貢家園相去三百里一葦可杭闔門二百  
指皆仰祿焉此先生裔雲所覃某到郡後頗與郡人相

安日來四境無虞早收中熟覺風雨如期晚稻亦可望  
惟是力綿求牧來自方長凜乎淑後先生襦袴舊譜出  
其一二以惠緩之蒙戴而行敢不知賜某於左右缺禮  
久矣謹寅奉赤紙申綠野平安之間采采澗芹犯嚴悚  
仄未卜間侍願言觀顧視履益扶神明以慰中外屬望  
臨風拳拳

與贛州屬縣宰

額有公稟保伍本領在於隅園比者郡家稟使者之命

欲於十縣從新整刷一番見之公文固已詳盡所謂差  
過隅團蓋所在積弊有公差者有買充者正在賢令尹  
用其明焉可因者因可革者革按之舊籍參之僉言一  
日而可決也使者屢問反此却望辦以敏手月末如期  
申來隅團定則保伍周保伍周則盜賊弭郡之所以蒙  
成也而縣亦職有利焉申嚴出甲榜比想皆已家至今  
有賞罰鏤榜煩更徧揭

回袁永州

某引首三呂環清匯碧神仙人居之坐隔千里方嘆衡  
鴈之參差緹騎秋風落我虹翠楚然瑤華音之在耳也  
恭惟某官以羔羊素絲為節槩以清霜紫電為精神以  
布帛菽粟為政事自擁千車來照二水發舒家學一二  
便足以破奸膽甦民氣期月而可百廢具興萬石山中  
遂為古潁川渤海郡真刺史敏手也清廟訪落諸侯來  
朝風聲堂堂歸植千載某承乏便州僥倖娛侍庭空無  
事年穀粗登凡前此龍蛇之淵皆屏跡絕影要是忝教

宿昔陰有以惠利之然親意亦復念家旦夕飯命香火  
歸哺山之南水之北矣遠道寄將有實其庭吾味之厚  
不翅懷連城而佩明月也臨風慷慨亟此馳謝尚猷緝  
蘭申候起居伏乞台照

賀京尹曾尚書

某茲者共審露綸渙渥星履陞華東潤西渥冠十連之  
元帥南昌北斗表六典之地官丹屏雲開紅牙日麗恭  
惟某官依乘日月吞吐江湖直氣摩空金天晶之錯落

清規照世玉井水之紺寒自歲歲於鸞聲遄峩峩乎旁  
角文章大手南豐先生政事十條小范老子出袖摩霜  
之鉞坐吟卷雨之簾真侍從歸拜於甘泉慈父母來臨  
於京兆乃由太一徑陟文昌冰懸雪夸而朝望孚日暖  
潮平而民氣悅儼衣冠於建禮益鎮千絳籌帷幄於延  
和遄歸兩地某喜傳除綺阻趨賀綦五緯明霄望龍泉  
之秋色九河流潤懷虹翠之春暉謹具劄子賀申伏乞

台照

回曾知縣晞顏

號東軒後除御史

某去秋知紫氣飛度鴈峯法不得相候西風徹棘新雨  
來車知必不我遐棄也未幾喜聞玉垣飛檄榮甚錦歸  
交臂參差殊重回首今年出湘之日乃千騎載入湘之  
時又不得相隨雞豚社中一數契闊相隔耿耿心知不  
圖帳犀遠持五雲下責虹翠筆墨淋漓起敬英妙而繹  
藉所及不敢當不敢當某堂有重慈自高安歸後十年  
不克迎侍昨歲叨節本不能出請祠不獲命姑以單騎

驅馳非其欲也轆轤白雲情表連上君師天地之造界  
之便州非徼福穎遺端不反此千里遠將折寄何厚衣  
被重襲其宏多矣乍理摩拂稟對皋晏薄附片心非所  
以為報也蓬萊玉雪小寘之松竹間會有新編倚布婁  
賀

回曹連推宗甫

名尹

某淪穎廉清起而謝所蒙東嚮亹亹一拜幾何年西方  
美人豈不夙夜飛鴻踏雪闌其廓寥去年漫浪行湘於

東軒公甚相厚謁來入境入日從巖山先生遊獨於吾  
泰宇何其闊如也春榜既開聞謝家鳳毛世科盛事矣  
渠勝處僅隔庾梅每念肇牋寫此襞積乍入沸糜中墮  
此不敏而琳琅金薤卷五仙雲氣下之言念知心喜而  
不寐吾泰宇以乾坤清氣晶晶銀河朝發輒兮咸池膜  
曝鱗於沃焦以其時可矣河陽幕中雲飛川泳老子倚  
胡床誇有此容佇由黃金臺徑上青瑣闈某單車馳峋  
蟠下十閱月大行白雲繚繞清夢陳情一再天高聽下

界以便符奉重闈抵空同三見莫矣矣郡稍簡靜得遂  
半菽歡皆錫類所及也渠渠然頌不以規望塵辟易芳  
菲遠道第懷我私聞車馬行色且旦夕出領某倘未以  
罪去得握手道舊豈不快哉占謝蒞如馳遡一碧

回李本中

某一節稍疎聞問千里相望方賦所思得手書讀之展  
轉清話懶此契闊某數年以兒女講授為琴書累發初  
啓蔽作成方來三世交遊此意不敢忘去區區出山親

老不任行役雲龍隔絕不得日奉從容本中獨處寒齋  
覺戶外屢不至靜中倍有方冊工夫然門可張羅庖隸  
自放所以奉師者必甚鹵缺負愧奈何諭及小子年漸  
長當學聲律尤認真至第此兒自以為得師甚欲從師  
學而學焉又念吾先人以賦起門重於改作貪賢且奈  
何今姑遵來教擇賦師為代但未知來年有意他出否  
倘有圖回某雖江湖懸隔豈無可效綿者拳拳此衷亦  
以屬之新昌弟唯命東西矣敬憑使稟控別牋薄物少

寄芹私令祖固學老先生尊候多福侍邊乞道起居

回長沙傅縣尉合

某他日接玉泉於涓涓中去之十年君且撫汗漫神變化而為龍已高言軋霄自當向上位置需雲岳翠不淹騰踔乎旁府知心貽書道君出處之槩廣文又緹襲琳琅以來目中將快見繙之好也敢不預戒行窩汎掃以俟雖然落木荒涼之境飄風濛蕩之蹤以君堂堂發軾而肯相從於庵俎間此意攜持琬琰者不屑也吾意不

薄惟君熟裁之持對不敏切惟照寬

文山集卷八